



蘇華亭十種

僧
541
9

九



門 信
54/
卷 9

南漢文字畧卷二

順德梁廷枏章冉輯



陳十八郎

尊勝經石幢記

上缺 乾和三年太歲乙巳三月八日丙寅 下

缺 陳十八郎敬贖造加 缺 佛尊 缺 陀羅尼幢

一座追薦幽途胡謨物并乞自 下缺 長於羅

浮 下缺 禪院供養設齋慶讚訖

畧

按幢在羅浮山寶積寺

門外太作大薦作薦

雷嶽

事三主麻官御書院給事南漢書有傳

匡真大師塔銘

詳夫水月定形覺浮生之可幻火蓮發艷知
 覺性之宜修故妙果圓明寂爾而不生不滅
 真如常住湛然而無去無來祛其華則是色
 皆空存其實則眾魔咸折亦由山藏白玉泥
 塗不能汙其珍沼出青蓮塵垢不能染其質

者也故匡真大師業傳西裔性達南宗戒珠
 朗而慧日融光覺海揚而慈霖普潤示非法
 無法之說若電翻輝應真空不空之談如鍾
 逐扣以心唯清淨道本慈悲常挑智慧之燈
 洞照昏衢之路將使化周有截終期證後無
 為故我釋迦如來厭綺羅絲竹之音痛生老
 病死之苦踰金城而學道依檀持而修真六
 載成功萬法俱熟為四十九年慈父演八萬

四千法門現千百億化身

此句似衍一字遍娑婆世

界說多多緣起開種種導門誓化迷淪令超
正覺于時求法寶者是諸沙數得道者於意
云何小則證須阿洹斯陀含大則超阿羅漢
辟支佛卷舒自在蓮花中藏十二音聲變現
無窮芥子內納三千國上邇後化緣將卒示
滅雙林卽以法服衣傳于迦葉葉傳阿難難
傳商和那修修傳優波毘多如此展轉相傳

俾令常住世不滅矣泊至曹侯溪大圓滿至
真起覺大師是為第三十三世祖若祇認達
磨禪師傳衣法至于曹溪則中華推為第六
祖焉故西來智藥三藏駐錫曹溪云一百七
十年後當有無上法寶肉身菩薩于曹溪興
化學道者如林故號曹溪為寶林自祖師成
等正覺後現一百六十九口生身菩薩遍在
諸方行化邇后得道莫知其數皆曹溪之裔

也故匡真大師嗣于一葉焉師諱文偃姓張氏晉王罔東曹叅軍翰十三代孫也翰知世將泯見機休緣徙于江淞故胤及我祖生于蘇州嘉興郡師幼慕出塵乃棲于嘉興空王寺志澄律師下爲童凡諸經無煩再閱及長落髮具足于常州壇後侍澄公講數年頃家四分指歸乃辭澄謁睦州道蹤禪師則黃蘗之孤也一室常閉四壁唯空或復接人無容

佇思師卷舒得志徑往扣門禪師問誰師曰文偃師關門云頻頻來作什麼師云學人已事不明禪師曰秦時轆轤鑽以手托出閉門師因是發明又經數載禪師以心機祕密關鑰彌堅知師終爲法海要津定作禪天朗月因語師云吾非汝師莫住師遂入閩纔登魚骨直奮鵬程因造雪峰會三禮欲施雪峰乃云何得到詰麼師不移絲髮重印全機雖等

截流還同戴角由是學徒千餘凡聖莫審師
昏旭叅問寒燠屢遷摳衣惟切於虛心得果
冥輸于實腹因有僧問雪峰云如何是觸目
不見道運足焉知路雪峰云蒼天僧不明問
師師曰三斤麻一疋布僧後問於峰峰云嘻
我常疑個布衲師於會裏密契立機因是出
會遍謁諸山尊宿頗有言句世所聞知後雪
峰遷化學徒乃問峰佛法付誰峰云遇松偃

處住學徒莫識其機偃者蓋師名也至今雪
峰遺誠不立尊宿辛未禮于曹溪旋謁靈樹
故知聖大師以心機相露膠漆契情歲在丁
丑知聖大師一日召師及學徒曰吾若滅後
必遇無上人爲吾茶毘至戊寅高祖天皇大
帝巡狩韶石幸于靈樹知聖遷化果契前約
敕爲執之獲舍利塑形于方丈于時詔師人
見特恩賜紫衣敕師于本州廳開堂師於是

踞知聖筵說雪峰法實謂禪河汹涌佛日輝
華道俗數千問答應嚮郡守何公希範禮及
曰弟子請益師曰目前無異草有人問如何
是本來心師云舉起分明別有言句錄行于
世爾後大師心唯恬默奏乞移菴敕允癸未
領學志開雲門山五載功成四周雲合殿宇
之簷楹翼翥房廊之高下鱗差邃壑幽泉挫
暑月而寒生戶牖喬松修竹曷香風而韻襍

宮商近於三十來秋不減半千之眾歲納他
方之供日豐香積之厨有殊舍衛之城何異
靈山之會院主師傅大德表奏院畢功敕賜
光泰禪院額及朱記至戊戌歲高祖天皇大
帝詔師入闕帝問如何是禪師曰聖人有問
臣僧有對帝曰作麼生對師云請陛下鑒臣
前語帝悅云知師孤戒朕早欽敬宣下授師
左右街僧錄師默而不對復宣下左右曰此

師修行已知蹊徑應不樂榮祿乃詔曰放師歸山可乎師欣然山呼萬歲翌日賜內帑香藥施利鹽貨等迴山并加號曰匡真厥後每年頻降頒宣繁不盡記恭惟我當今大聖文武立德大明至道大廣孝皇帝歲在單闕運聖謨而手平內難奮神武而力建中興恩極八紘道弘三教乃詔師入內經月供養賜六銖衣一襲香藥施利等而迴并御製塔額預

賜爲寶光之塔瑞雲之院師自從示眾卓爾宗風凡在應機實當奇特常一時見眾集久乃云汝若不會三十年莫道不見老僧時有三僧一時出來禮足師云三人一狀有問禪者則云正好辨有問道者則云透出一宗有問祖意者則云日裏看山有纔跨門者則以杖打之有時云眾云直下無事早是埋沒也迷緣不已豈是徒然畧舉大綱將禪往代師

畧

以法無定相學無准常每修一忌齊用酬二

嗣諱

此處字似有訛

師一坐道場三十餘載求法寶

者雲來四表得心印者葉散諸山則知覺路
程開雙林果滿諸漏已盡萬法皆空雖假臥
漳未少妨於叅問終云虛幻乃示寂以韜光
侍者奉湯師付盃子曰第一是吾着便第二
是汝着便記取遣修表祝別皇王乃自札遺
誠曰吾滅後汝等弗可效俗教着孝服哭泣

喪車之禮則違佛制有紊禪宗也付法于白

雲山實性大師志庠師會下已匡徒眾已酉

歲四月十日子時師順世嗚呼慈舟壞兮輪

迴失渡法山摧兮飛走何依緇倫感薤露之

悲檀信動式微之詠宋雲遇處但携隻履以

無還慈氏來時應召三峯而再出月二十有

五諸山尊宿具威儀道俗千數送師于浮圖

靈容如昔依師訓塔于當山方丈內法齒七

紀二僧臘六旬六于日行雲斂態隴樹無春
 覩嶽孤猿啼助哀傳之苦穿林幽鳥聲添惜
 別之愁弔客掩襟佇立以泣在會叅學小師
 守堅終始荷贊洞契無為門人淨本大師常
 實等三十六人知事皆明佛性雅得師宗也
 在京弟子報恩寺內供奉七十餘人皆出自
 宮闈素精道行敕賜與師為弟子法經內僧
 錄六通大師教中大法師道聰洞容人門尤

精外學也嶽鏤冰藝缺映雪功疎自愧斐然
 濫承厚辟編成實性紀彼銘云

師歸何處超然寂然愛河萬頃涉若晴川其一

恩超四果難降眾魔迷則眾劫悟則刹那其二

是色非色真空則空如水涵象若燭隨風其三

雖云有佛難窮于佛如地有芽逢春自出其四

菩提無種覺花無子妙果如成有何生死其五

是法非法恍惚難尋無內無外即心傳心其六

畧

劫名成灰兮邱陵潛燬大海為田兮人倫斯

改紀師實性兮刻于貞珉龍化會開兮師蹤

如在漢大寶元年歲次戊午十二月一日建

按此與陳守中所紀文偃事畧有同異透出一宗宗字守中作字僧問觸日不見道

峰日呼不明又問師曰更奉三尺竹高祖問作麼生是本來心曰舉起分明並異

龔澄樞咸寧人先主時為內給事後主時累官至內太師南漢書有傳

西鐵塔記

玉清宮使德陵使龍德宮使開府儀同三司

行內侍監上柱國龔澄樞同女弟子鄧氏三

十二娘以大寶六年歲次癸亥五月壬子十

七日戊辰鑄造永充供養

入緣弟子內給事都監韶州梁延鄂

弟子劉軍缺

按塔四面刻銘各七行行八字至十字不等外一行官名文皆同皆有佛號三面字

皆殘缺過半惟西面獨完好末一行亦為三面所無是塔作於大寶六年澄樞所自

造東塔作於大寶十年李托等奉敕造朱竹垞先生曝書亭集謂二塔並立一屋一

畧

作記一題名固誤翁覃溪先生粵東金石畧云竹垞謂其列名皆宦者今觀其列名皆沙門監造而宦者惟澄樞一人今按西塔無沙門題名東塔宦官又止李托無澄樞名則金石畧所記亦誤也

李托等托封川人事先主為內府局令後主時累進內太師南漢書有傳

東鐵塔記

大漢皇帝以大寶十年丁卯歲勅有司用烏金鑄造千佛寶塔壹所七層并相輪蓮花座高二丈二尺保龍躬有慶祈鳳麻無疆萬方

咸使於清平八表永承於交泰然後善資三

有福被四恩以四月乾德節設齋慶讚謹記

上缺使秀下缺宮點檢下缺將軍行下缺開

國伯食邑七伯戶下缺

教中大法師內下缺監下缺大夫檢校工部

尚書缺法缺師沙下缺

上缺中大下缺檢校缺部尚書下缺門下缺

教中大法師內供奉講經首座金紫下缺夫

檢校工部尚書寶法大師沙門臣 下缺

內殿大僧錄教中大法師金紫光祿 下缺 檢

校工部尚書曉真大師法門臣道 下缺

按塔記鑄鐵為之已剝蝕不完卯輪躬數字已缺金石萃編本咸下又缺一字南漢春秋所載是底字道光廣東通志金石畧作使字以拓本考之固使字也又佛上一字萃編本誤作十字千上兩本均缺一字細繹拓本實空格也今據南漢春秋本補入而更正之

陳守中 後主時官西御院使集賢學士承旨遷大中大夫知太僕寺事南漢書有傳

匡聖宏明大師碑銘

原夫真空無相劫火銷而性相何來妙法有緣元氣剖而因緣何起造化莫能為關鍵元黃不可為種根乚乎十號之尊出彼三祇之劫增莫知而滅寧覩詎究始終望不見而名無言孰明去住不有中有不空中空匪動匪搖常寂常樂拘留孫之過去釋種圓明毗婆尸之下生元苻合契繇是修行道著相好業

成爰授記於定光迺度人於摩揭自是一音
演說二諦宏宣開八萬法門化三千世界大
乘六而小乘九慧業難基欲界四而色界三
昏波易染所以興行六度接引四生求真者
竟洗六塵修果者咸超十地盡使昏衢之內
俱萌捨筏之心大廕人天俾居淨土其後衣
纏白氎屣脫金沙示無住之身現有終之理
於是迦葉結集阿難證真遞付心珠住持法

藏象教遠流於千壘覺花遍滿於十方馬鳴
興護法之功龍樹顯降魔之力師師相受法
法相承大化無窮不可思議而自我祖承運
明帝御乾符聖夢以西來圖粹容而東化金
言玉偈摩騰行首譯之文鹿菀雞林佛朔遂
身遊之化迨於魏晉迄至隋唐達理者甚多
得道者非少其如麻帝麻代有廢有興未若
當今聖明欽崇教相者也伏惟睿聖文武隆

畧

德高明宏道大光孝皇帝陛下德參覆載道
合照臨叶九五之龍飛應一千之鳳厯承帝
嚳有堯之慶鴻業敦興體下武繼文之基聖
功崛起每念八紘紛擾九土艱虞耀干戈弧
矢以宣威救生靈塗炭用聲明文物而闡教
致寰宇雍熙櫛沐忘勞鑿大禹之所未鑿造
化不測開巨靈之所未開慶雲呈而甘露垂
嘉穀生而芝草出其於儒也則石渠金馬到

定古今八索九邱洞窮淵奧其於道也則探
元抱朴得太上之妙門寶籙靈符授虛皇之
秘訣於機暇旣崇於儒道注宸衷復重於佛
僧是以奉三寶於虛空福萬民於寰宇紺宮
金剎在處增修白足黃頭聯辰受供而乃頻
彰瑞感顯應昌期矧以韶石奧區漕溪勝地
昔西來智藥三藏駐錫於漕溪曰一百七十
年後當有無上法寶肉身菩薩於此興化學

道者如林故號漕溪曰寶林也二十八祖之心印達磨東傳三十三代之法衣祖師南授自六祖大師登正果之後所謂學者如林天下高僧無不臻湊者矣大慈雲匡聖宏明大師者則別穎一枝也大師澄真不渾定性自然馳記荊之高名躡迦維之密行惠燈呈耀智劍發硯六根淨而五眼清不染不著四果證而三明朗自悟自修啟禪門而定水泓澄

搜律藏而戒珠瑩徹水上之蓮花千葉清淨芬芳空中之桂魄一輪孤高皎潔機無細而不應道有請而必行固得百福莊嚴萬行圓滿盡諸有漏達彼無為大師諱文姓張氏吳越蘇州嘉興人也生而聰敏幼足神風不雜時流自高釋性纔逾卅歲便慕出家乃受業於嘉興空王寺律師志澄下為上足披經懌偈一覽無遺勤苦而成依年具尸羅於常州

戒壇初習小乘次通中道因聞睦州道蹤禪師關鑰高險往而謁之來去數月忽一日禪師發問曰頻頻來作什麼對曰學人已事不明禪師以手推出云秦時轆轤師因是發明微而有理經數載策杖入閩造於雪峰會下三禮之後雪峰和尚頗形器重之色是時千人學業四眾咸歸肅穆之中凡聖莫測師朝昏參問寒煖屢遷昂鶴態於羣流閑禪扉

於方寸因有僧問雪峰曰如何是觸目不見道運足焉知路雪峰曰吽其僧不明舉問師此意如何師曰兩斤麻一疋布僧又不明復問何義師曰更奉三尺竹僧後聞於雪峰峰曰噫我常疑箇布衲其後頗有言句繁而不書乃於眾中密有傳授因是出會游訪諸山後雪峰遷化學徒問曰和尚佛法付誰峰曰遇松偃處住學徒莫測偃者則師之法號也

遺誠至今雪峰不立尊宿辛未屆於漕溪旋
謁靈樹故知聖大師如敏長老以識心相見靜本
畧同儔侶接延僅逾八載丁丑知聖忽一日
召師及學徒語曰吾若滅後必遇無上人爲
吾茶毗及戊寅歲知聖大師順寂恰遇高祖
天皇大帝駕幸韶陽至於靈樹勅爲焚爇果
契前言也師是時奉詔對敷便令說法授以
章服次年又賜於本州爲軍民開堂師據知

聖筵說雪峰法牧守何希範禮足曰弟子請
益師曰目前無異草是日問禪者接踵其對
答備傳於世師尙後倦於延接志在幽清奏
乞移庵帝命俞允癸未領衆開雲門山構創
梵宮數輦而畢莫不因高就遠審地爲基層
軒邃宇而湧成花界金繩而化出曉霞低覆
絳帷微襯於雕楹夕露散垂珠網輕籠於碧
凡匝匝盡奇峰秀嶺逶迤皆潑黛堆藍泉幽

而聲激珠璣松老而勢擎空碧由是裝嚴寶相合雜香廚樞衣者歲溢千人擁錫者雲來四表菴羅衛之林畔景象無殊耆闍崛之山中規模匪異院主師傳表奏造院畢功勅賜額曰光泰禪院至戊戌歲高祖天皇大帝詔師入闕朝對有容因宣問曰作麼生是本來心師曰舉起分明帝知師洞韞元機益加欽敬其日欲授師左右街大僧錄遜讓再三而

免翌日賜師號曰匡真大師延駐浹旬賜內帑銀絹香藥遣迴本院厥後常注宸衷頻加賜賚尋伏遇中宗文武光聖明孝皇帝繼承鴻業廣布皇風廓靜九圍常敬三寶復降詔旨命師入於內殿供養月餘仍賜六銖衣錢絹香藥等却旋武水并預賜塔院額曰瑞雲之院寶光之塔師禪河浩淼聞必驚人有問禪者則云正好辨有問道者則云透出一字

有問祖師意者則云日裏看山凡所接對言
機大約如此了義元遠法藏幽微化席一興
歲華三紀師於生滅處在色空中來若鳳儀
作僧中之異瑞去同蟬蛻爲天外之浮雲於
屠維作噩之歲四月十日寢膳微爽動止無
妨忽謂諸學徒曰來去是常吾當行矣命侍
者奉湯師付湯椀於侍者曰第一是吾著便
第二是汝著便亟令修表告別君王乃自札

遺誠曰吾滅後不得數俗家着孝衣哭泣備
喪車之禮則違我誠有紊禪宗也付法於白
雲山實性大師志庠其日子時瞑目怡顏疊
足而化嗚呼化緣有盡示相無生端然不壞
之身寂尔歸真之性惠兼雖乾於此界法山
復化於何方峰雲慘澹以低垂衆鳥悲鳴而
不散學徒感極瞻鴈塔以銜哀門客戀深拜
禪龕而雪涕以當月二十有五日諸山尊宿

四界道俗送師入塔壽齡八十六僧臈六十
 六香飄數里坐振一隅護法龍神出虛空而
 閃爍受戒陰隲現髣髴之形容其後諸國侯
 王普天僧眾聞師圓寂竟致齋羞而後一十
 七年我皇帝應天順人垂衣御極順三靈而
 啟聖紹四葉之耿光大振堯風中興佛法至
 大寶六年歲次癸亥八月有雄武軍節度推
 官阮紹莊忽於夢中見大師在佛殿之上天

色明朗以拂子招紹莊報云吾在塔多時汝

可言於李特進

秀華宮使特
進李托也

托他奏聞為吾

開塔紹莊應對之次驚覺麻然是時李托奉
 勅在韶州於諸山門寺院修建道場因是得
 述斯夢修齋事畢迴京奏聞聖上謂近臣曰
 此師果圓滿坐化多年今若託夢奏來必有
 顯現宜降勅命指撫韶州都監軍府事梁延
 鄂同本府官吏往雲門山開塔如無所壞則

畧
奏聞迎取入京梁延鄂於是准勅致齋然後
用功開鑿菩薩相依稀旋觀蓮花香馥郁先
聞須臾寶塔豁開法身如故眼半合而珠光
欲轉口微啟而珂雪密排髭髮復生手足猶
軟放神光於方丈晃耀移時興瑞霧於周迴
氤氳永日卽道卽俗觀者數千靈異旣彰尋
乃具表奏聞勅旨宣令李托部署人船往雲
門修齋迎請天吳息浪風伯清塵直濟中流

俄達上國勅旨於岨嶮步駐泊翌日左右兩
街諸寺僧眾東西教坊四部伶倫迎引靈龕
入於大內螺鈸鏗鏘於玉闕幡花羅列於天
衢聖上別注敬誠賜昇秘殿大陳供養疊啟
齋筵排內帑之瓊珍饌天廚之蕙藻列砌之
驪珠斛滿盈盤之虹玉花明浮紫氣於皇城
炫靈光於清禁聖上親臨寶輦重換法衣謂
侍臣曰朕聞金剛不壞之身此之謂也於是

畧

許羣寮士庶四海蕃商俱入內庭各得瞻禮
瑤林畔千燈接晝寶山前百戲聯宵施利錢
銀不可殫紀以十月十六日乃一制曰定水
澄源火蓮發豔夙悟無生之理永畱不朽之
名萬象都捐但秘西乾之印一真不動惟發
南祖之燈韶州雲門山證真禪寺匡真大師
早契宗乘洞超真覺雖雙林示滅十七年靡
易金軀隻履遺蹤數萬年應迴葱嶺朕顯膺

厯數纘嗣丕圖洎三朝而並切皈依乃一心
而不忘迴向仰我師而獨登果位在沖人而
良所歎嘉宜行封賞之文用示褒崇之典可
贈大慈雲匡聖宏明大師證真禪寺宜昇爲
大覺禪寺重臣將命乳奠坤儀太常行禮於
天墀綸誥宣恩於雲陛固可冥垂慈貺密運
神通資聖壽於延長保皇基於廣大師在內
一月餘日聖澤優隆七寶裝龕六銖裁服頒

畧
賜所厚今古難倫當月二十九日宣下李托
部署却迴山門有參學小師雙峰山長老廣
悟大師賜紫竟欽温門山感悟大師契本雲
門山上足小師應悟大師常寶等同部署真
身到闕亦在內庭受供恩渥異常其諸上足
門人常厚等四十餘人各是章衣師號散在
諸方或性達禪機或名高長老在京小師悟
明大師都監內諸寺賜紫常一等六十餘人

或典謀法教或領袖沙門臣才異披沙學同
鑄水虔膺鳳旨紀實性以難周愧匪雄詞勒
貞珉於不朽乃爲銘曰

於穆大雄教敷百億亭育二儀提攜八極不
滅不生無聲無色卓爾神功昭然慧力其化
無不周道無不備法旣流兮教旣布矣爰示
滅樂歸乎妙理實性真宗枝分風靡其祖祖
傳心燈燈散燭詮帝騰鑣聖賢交躅種種津

梁門門杼軸正覺廣焉尋之不足其三厥有寶

林重芳一葉布無上乘登無上檝法炬臙臙

尼珠煒煜拯溺迷津救焚塵劫其四南北學徒

掘衣朝夕無醉不醒無昏不釋示其生焉來

彰慧績示其滅焉歸圓真寂其五湛然不動塔

韞寶光玉毫彌赫金相彌莊時乎未矣我則

晦藏時乎至矣我則昭彰其六爰於明朝現茲

法質如撥障雲重舒朗日瑞應皇基福隆帝

室聖覽禎祥恩頒洋溢其七三翼沿沂千里請

迎迎來丹闕設在三清金銀羅列瓊壁堆盈

俄生紫氣潛覆皇城其八日陳供席夜奏笙歌

施億寶貝捨萬綺羅神傾蔭葡天降曼陀前

佛後佛顯應斯多其九明明聖君仁仁慈主聖

比和風慈同甘雨祚與天長教將地固勒之

貞珉永芳千古其十維大寶七年歲次甲子

四月丁未朔列聖宮使甘泉宮使秀華宮使

翫華宮使開府儀同三司行內侍監上柱國
 臣李托 玉清宮使德陵使龍德宮使開府
 儀同三司行內侍監上柱國武昌縣開國男
 食邑三百戶臣龔澄樞承旨建 右街大乾
 亨寺內殿供奉講論兼表白意法大師賜紫
 沙門臣行修奉勅書 右龍虎軍控鶴將軍
 陪戎副尉臣孔廷謂臣廷津臣陳廷嗣臣鄧
 懷忠等鑄字

按碑本鑿作鑿剝作剝曹溪之曹作漕載
 作牽月作凡海作兼皆與刊本異其文並
 與乳源縣志及五代史記注所載本又少
 有同異注本缺老矣誠有秦禪宗地振炫
 利銀錢位所毫等字不立尊宿辛未注本
 作不立導無辛字又志本欲界之界作戒
 俱萌之萌作明屣脫之屣作履藏象之藏
 作象相受之受作授佛胡之朔作塑宏道
 之道作通繼久之久之作文天上之天作太
 是妙之妙作以僧脩作增修泪六祖之泊
 作自果證之證作澄幼足之幼作多譯偈
 之譯作懌數月之月作日兩斤之兩作三
 後聞作復問屈于之屈作居路同之路作
 畧吾若滅後必遇無上人志無若無字使
 令作便命歲溢之溢作益僧號之僧作師
 遣迴之迴作還中宗下無文武八字降詔

畧

無詔字題賜塔院作預塔院額師意無師
字命侍者無命字本府無府字用功開鑿
無用功字異耀之共作見盈船之船作盤
於廣大之於作而優渥之渥作隆章衣之
衣作服長者之者作老交躅之交作受皇
降之降作基福隆之福作降今從碑本而
考證諸刊本
補其闕文

僧神坦

長慶禪院銅鐘款

漢乾和十五年歲次丁巳十一月一日癸未
朔二十日壬寅雲母山長慶禪院沙門神坦

普勸眾緣鑄造洪鐘一口重八百斤上資國

祚普及四恩下濟三有永充供養

按款內既書十一月一日復云癸未朔於
義為複又濟作濟蓋當時沙門中不通文
者所為也

吳懷恩

番禺人先主時為內府局丞累官桂州
團練使為部軍所殺南漢書有傳

感報寺銅鐘款

維大漢乾和十六年太歲戊午閏六月庚辰
朔十六日己未弟子南華官使桂州管內招

南漢文字

卷二

三

畧

討使特進行內侍上柱國吳懷恩鑄造鴻鐘
一口重五百斤置於梧州雲蓋山感報寺永
充供養上資當今皇帝龍圖永固聖壽萬春
謹記

按鐘在蒼梧縣光孝寺高三尺口徑一尺
七寸真書徑六分

劉崇遠

新開宴石山記

以上缺容州管內都製置鹽鐵發運等務竝

白州永資院點檢義勝等都缺務缺賜紫金

魚袋劉崇遠 蓋聞住非聲而去非色無滅

無生視不見而聽不聞有缺有下缺三空俄

顯一德爰彰善念必通勤行可學明明宗旨

一厯厯程途實有路以堪躋缺二門而可入自

是心源不透智筏未征達彼岸以何由湊元

關而莫迨崇遠自親禁掖厚忝渥恩凡覩靈

蹤悉虔俗志冀精勤於一善上報答於九重

宴石山者在白州博白縣之西鄉與馬門灘

伏波公之祠鄰近圖經云昔有神人稱陳越

王今有古宮基址見在廉州合浦縣缺二字曾

宴於此山故以為名焉其山也西枕清波南

連翠缺曉則輕雲簇白晝則遠樹攢青石罅

泉噴點點而斜飛皓雪缺二字花秀叢叢而密

綴紅缺左紉右迴前龜後鶴蔬足菓足松寒

竹寒昔曾有人臨水缺二字作佛像約高五丈

餘未窮其年代者矣缺有壬向石室一所唐

咸通中高相座缺統十道兵師禦八蠻疆境

經行之際於此缺塑造佛像今以缺二字崇遠

因監製運遂切經營乃命良工闢為精舍一

山迥矗兩室相鄰缺是以黑金鑄釋迦瑞象

設於東室又鑄釋迦牟尼佛一座兼別鑄五

百阿羅漢缺二字羅漢設於西室其次有石引

廊齋堂僧房等在於室外請僧師肇道志惟

敏惟忠住持焚修缺則飛章聞奏皇澤爰頒

賜額號於缺二今為覺果之禪院缺謂覺乃

大覺之缺果乃勝果之門覺與果齊果因覺

集缺三外天鑒洞臨致去石嵐永為勝地又

別有東峯石山一座中有東西南北四室鬼

峩若畫礪磈如鑄直疑乎造化剜開又恐是

神仙斲出多景多致唯煙唯霞亦以黑金鑄

玉皇道君老君天地水三官竝塑左空右元

真人玉童玉女左右龍虎君元中大法師設

於室內卓爾威儀森然侍衛請道士廖德崇

劉守清盧守和等別建道院住持焚修以乾

和十五年丁巳歲八月二十三日建迄于

大寶元年戊午歲十二月二十七日畢功建

置道場設齋慶讚訖莫不青蓮金柱如忉利

以初來錦舌蒼肝似藥珠而乍降繇是命乎

緇侶招彼羽人金鑪曉炷以粉醞銀炬宵燃

畧

而炫耀用全因果上贊休明缺來四海之朝

宗盡類眾星而拱極功既畢矣願且周焉可

以齊嵩華之堅可以竝江河之永靈基勝跡

萬古千秋時大漢大寶二年太歲己未九月

癸卯朔二十四日丙寅記 晨輝殿使知白

州軍州事都管勾容州管內都製置鹽鐵發

運等務朝請郎檢校尚書工部員外郎柱國

賜緋魚袋樊匡嗣榮秉郡符同崇缺勝社

左靜下缺都部領將金紫光祿大夫左領缺

將軍檢校刑部上書缺五上柱國蔡彥宏

缺寧遠軍節度衙前兵馬使充製置務表狀孔

目官缺昭書 製置務客司軍將李道員鐫

按記真書徑八分許在博白縣考縣志云
宴石山在頓穀堡與紫陽巖相連兩地寺
觀皆劉崇遠闢建僭竊之世具此物力取
於民多矣己未周恭帝顯德六年也記為
覺果禪院作蔡條鐵圍山叢
談稱普光寺者宋時改名耳

僧義初

南漢文字

卷二

三

畧

寶林禪院鐘款

一 粵維大寶二年太歲己未七月甲辰十九日
 一 王戌樂昌黃蓮山寶林禪院住持長老明徽
 一 大師賜紫沙門義初召眾緣鑄造銅鐘一口
 一 重四百斤勸首弟子給事郎守內侍省內府
 一 局令都監樂昌防遏諸都并監樂昌院事賜
 一 紫金魚袋鄭敬贊以七月二十八日設齋慶
 一 讚永充供養 奉勅鐫題黃蓮山銅鐘壹口

官力

僧崇愍等

乾亨寺銅鐘款

一 維大漢大寶四年歲次辛酉九月辛酉朔二
 一 十五日乙酉鑄造銅鐘一口重一千五百斤
 一 於乾亨寺永充供養僧正大德崇愍都監大
 一 德行超監寺大德都維那僧楚彤住持從義
 一 楚澄榮然戒詮智暹知亮宏遇西頭供奉官

都監賀州防拓應援等軍竝監賀州事徵事
 郎守內侍省內府局令賜紫金魚袋梁延康
 管甲指撫使全友誠劉處詳佐遷內承旨黃
 守鐔指撫使陳匡遠左雄勇指撫使都監賀
 州應援軍銀青光祿大夫檢校刑部尚書兼
 御史大夫上柱國郭達西頭高品譚文定西
 上閣門使副權錄事參軍梁延福 郭居弟
 子楊德威廖師進宋居訓黃進父詹延達鄧

承潤王廷猷梁承選蕭彥鎬黃仁祚李延亮
 孟漢璿劉意琅黃少璘陳延福胡延舉蕭彥
 湘王景起莫少宣陳進清孟漢達孟意通陳
 德用姚宏雅黃仁裕虞從慶上鄰倫延綬嚴
 匡演楊燦李常溫廖延通李延意莫楷虞才
 訓 女弟子蔣氏六娘黃二娘徐四十娘李
 十四娘虞二十一娘陳二娘歐陽十八娘陶
 五娘李二十八娘馮一娘 高品銀青光祿

大夫檢校國子祭酒兼侍御史柱國莫道贊

翰林缺待詔又林郎試大理評事王師訓

眾緣應援軍十將盧法住龐保定楊僧羅法

宰劉光美李善能楊象封帑陳令簡鄧會陳

道情梁雪羅貴楊道意楊公海覃廷儀潘廷

美馮金劉迢何匡韻龐婺兒伍僧會潘楚規

楊軍朗梁瑤盧嫩龔硯楊知蘇蘊黃延集楊

虔吳採龐奴甯舍梁彥通梁幼余戀甯光包

邵兒洗初鍾添唐勝梁云慶堯保成劉史乾

亨寺住持僧宏遇善儒志寬善慧寺監寺大

德緣集法喜正惠禪院監院大德智堅西山

勝果寺監持大德惠長寺主契真仁王寺監

寺大德善德峽山寺大德從惠審依東南道

靈化寺大德延蒲 鑄造匠人梁道崇顏位

鄧珠書人區昱鐫字匠人齊公延齊公握阮

仁與田從訓 眾緣弟子馬軍郭道崇陳延

畧

嗣何懷堅李懷進梁道崇李廷真區彥從錢
珣唐緒顏位陳彥詳防拓軍十將何肱聶軻
王畋成行柔阮敬芝張利保區珍陳廷桂李
辛宋從順楊廷懿蘇全志植昌鍼陳儂陳癸
黎小錐陳保得吳甯收區昱鄧珣楊延慶凌
孟益羅敬叟黎匡克黎崇徽陳法善梁觀音
林光嗣禰慶眾張僧養林讓梁匡錫陳延智
何佛養陳延壽梁保志馮僧保李文叨陳潘

久蘇亞張料六梁保綬何廷泛劉道誠梁敬
遷梁度嚴留梁光嗣吳佛保陳公遠區延志
聶再隆陳彥嵩盧光志王佛壽劉韶向延古
陳佛看蘇保兒蒙愛梁延愛梁和尚莫宋張
佛王老徐嫩植崇保梁懷徹盧延保區紹陳
承鄴黃知道王期陳師黎佛念鄧法護洗光
嗣李張盧邠封善修盧從縕陳思憲 女弟
子陳三娘區四娘宋九娘李八娘陳二娘任

畧

八娘簡十娘王一娘劉二娘李九娘廖二娘
趙十六娘徐九娘何一娘陳一娘 左廂都
押衙知桂嶺縣事歐陽敬忠右廂都押衙梁
存忠防城都押衙黃延靜四界馬步都虞候
知馮乘縣事孟漢瑋馬步都虞候莫慶典承
議郎守連山縣程崇珪捕賊官陳子勳虞承
遶馮合瑁軍事孔目官知寶城場務虞延懋
鼓鑄都勾孔目官知富川縣梁珠軍事押衙

官勾蕩山縣科敬楊蘊讀示孔目官鍾全美
廳勾孔目官陳昌鼓鑄孔目官鍾虔鈔曹都
鍾仁英州司孔目官虞保忠陳承保黃承畔
表奏孔目官費沆虞仁贊王廷規虞仁祚倉
督廖仁亮臨賀縣都行耆壽虞師岳陳子璩
歐陽續桂嶺縣都行耆壽李罕餘富川縣都
行耆壽王漢膺董仁興馮乘縣耆壽何仁富
蕩山縣耆壽黎霜層寶城場行首賓懷祚

畧

按鐘文真書徑五分在賀縣三乘寺高四尺四寸口徑二尺五寸四面皆有款廣西通志云其官位及僧徒稱謂亦足考一時之制內多異姓如洪慶植禪科賓之類禪音喧今南中尚有此姓而洗或作洗觀是鐘知其誤自五代時已然大寶辛未為宋大祖建隆二年考是年九月朔王戌此云辛酉亦差一日也

缺名

鎮象塔記

以大寶 下缺 月乙卯朔六日庚申 下缺 面招

討使行內侍監上柱國邵 下缺 地一殺收 下

缺 及諸寺院僧尼鑄造佛頂尊勝 下缺 尼 下

缺 大白衣觀 下缺 薩尊 下缺 塔五層四面龕

室裝嚴佛像又捨黑 下缺 差僧延嗣住持焚

修伏以所崇妙善蓋 下缺 羣象踏食百姓田

禾累奉勅下差人採捕馭括入欄烹宰應贖

軍 下缺 其戴甲披 下缺 負來之 下缺 遺骸滯

魄難超捨去 下缺 良因免涉幽局之苦速承

濟度永辭異類之徒

畧

按吳萊南海古蹟記云東莞鎮象塔禹餘宮使邵延瑀造粵京金石畧題大寶五年然據路振九國志延瑀於大寶七年始加招討使而今拓本已題有招討使之銜其年月名字俱缺疑未必果為延瑀矣詳南漢書考異

長壽寺鐘款

大漢皇帝維大寶七年歲次甲子正月一日
戊寅鑄造洪鐘一口重銅壹千四百六拾斤
於長壽寺永供養 其鐘元在長壽寺至今
戊辰歲四月八日却移於法明寺永充供養

都維那僧惟省直歲僧法光典座僧令恩上
座文昌

按戊辰為大寶十一年鑄鐘後四年而移於他所也

南漢文字畧卷二終

南漢文字

卷二

三

畧

南漢文字畧卷三

順德梁廷枏章冉輯

詩錄

黃損

有諫興建宮室疏已入文錄

公子行

春草綠綿綿，驕驂驟煖烟。
微風飄樂韻，半日醉花邊。
打鵲拋金盞，招人舉玉鞭。
田翁與蠶婦，平地看神仙。

南漢文字

卷三

一

畧
讀史

逐鹿走紅塵，炎炎火德生。
家肥生孝子，國霸有餘臣。
帝道雲龍合，民心草木春。
須知烟閣上，一半老儒真。

出山吟

來書初出白雲扃，乍躡秋風馬走輕。
遠近留連分岳色，別離嗚咽亂泉聲。
休將巢許爭喧雜，自共伊臯論太平。
昨夜細看雲色裏，進賢

星座甚分明

書壁

一別人間歲月多，歸來人事已銷磨。
惟有門前鑑池水，春風不改舊時波。

前鑑池水春風不改舊時波

按東坡志林損未老退歸遁去凡三十三
年乃歸書壁上投筆而去此即書壁詩也
全唐詩云與賀知章還鄉詩多同則此詩
果為損作否不可知矣詳南漢書本傳考
異損詩尚多剩句吟窓雜錄載機關纔
運動勝敗便相隨又忽遇南遷客若為西
入心又往來三島近活計一囊空又三通
明主詔一片白雲心又掃地待明月踏花

畧

迎野僧又水諳彭澤潤山憶武陵深又金
鑑冷光風宛轉錦袍紅潤雨霏微又高齊
日月方為道動合乾坤始是心零陵總記
淡塘別業云傍水野禽通體白飢盤山果
半邊紅湖湘故事鷓鴣云而今世上多
離別莫向相思樹下啼又見古今詩話
張瀛父碧有詩名瀛能世其學累官至曹郎

贈琴棋僧歌

我嘗聞師法一說波上蓮花水中月不垢不
淨是空色無法無空亦無滅吾嘗聽師禪一
觀浪溢鰲頭蟾魄滿河沙世界盡空空一寸

寒灰冷燈畔吾又聽師琴一撫長松喚住秋
山雨絃中雅弄若鏗金指下寒泉流太古我
又聽師棋一著山頂坐沉紅日脚阿誰稱是
國手人羅浮道士輸却藥法懷斟下紅霞丹
束手不敢爭頭角

按雅言雜系瀛嘗為歌贈琴棋僧同列見
之曰非是父不生是子

趙損

其先洛陽人光裔長子事先主官翰林學
士承旨尚書左丞進中書門下侍郎同平

章事南漢書
附光裔傳

畧

琴歌

綠琴製自桐孫枝十年窓下無人知清聲不
與眾樂雜所以屈受塵埃欺七絃脆斷蟲絲
朽辨別不會逢好手琴聲若似琵琶聲賣與
時人應已久玉徽冷落無光彩堪恨鐘期不
相待鳳嘒吟幽鶴舞時撚弄錚縱聲亦在向
曾守貧貧不徹賤價與人人不別前迴忍淚
却收來泣向秋風兩條血乃知凡俗難可名

輕者却重重者輕真龍不聖土龍聖鳳皇啞
舌鳴梟鳴何殊此悲哀怨苦寂寞沈埋在幽
戶萬重山水不肯聽俗耳樂聞人打鼓知君
立身待分義驅喝風雷在平地一生從事不
因人健步牽雲皆自致不辭重拂絃上塵市
塵不買多讒人莫辭憔悴與買取爲君一曲

號青春

廢長行

原注辨其惑於無益之戲而不務恤民也

南漢文字

卷三

四

紫牙鏤合方如斗二十四星銜月口貴人迷
此華筵中運木手交如陣鬪不算勞神運枯
木且廢爲官恤俸獨門前有吏嚇孤窮欲訴
門深抱冤哭耳厭人催坐衙早纔聞此戲身
先到理人似愛長行心天下安平多草草何
當化局爲明鏡挂在高堂辨邪正何當化子
作筆鋒常在手中作法令莫令終日迷如此
不治生民負天子

鐘允章

有雲華御室記已入文錄

絕句

舊業分明桂水頭人歸業盡水東流
春風日暮江頭立不及漁人有釣舟

按吟窓雜錄允章有咏射句云金箬離絃三尺電星鏑破的一聲雷

文丙

全五代詩丙曾官嶺南

羅浮山

羅浮多勝境夢到固無因
知有長生藥誰爲

南漢文字

卷三

五

畧

不死人。根雖盤地脈。勢自倚天津。未便甘休去。須棲老此身。

蘇花

寂寞人偏重。無心愧牡丹。秋風凋不得。流水泛應難。怪石從教徧。幽庭一任盤。若逢公子顧。重疊是朱欄。

柳

何事動吟哦。長堤翠色和。垂陰千樹少。送別

一枝多帶霧。籠彭澤。搖風舞汴河。只因隨帝植。民力幾銷磨。

牡丹

萬物承春各鬪奇。百花分貴近亭池。開時若也姮娥見。落日那堪公子知。詩客進中金瑤滿。美人頭上玉釵垂。不同寒菊舒重九。只擬清香泛酒卮。

王定保

有唐摭言序論已入文錄

畧

下第題長樂驛壁

三十驂騑一烘塵。來時不鎖杏園春。揚花滿地如飛雪。應有偷遊曲水人。

按定保第唐光化三年進士為容管巡官留仕南漢此詩蓋光化三年前作也

王詡

南海人先主析縣為咸寧常康遂為咸寧人舉乾亨初進士官至中書舍人南漢書

有傳

獨不見

日晚宜春暮風軟上林朝對酒近初節開樓

蕩夜謠石橋通小澗竹路上青霄持底誰見

許長愁成肢腰

蔣吉

全五代詩吉嶺南人

石城

繫纜石城下恣吟懷暫開江人撓艇子將謂

莫愁來

漢東道中

九十九崗遙天寒雪未消羸童牽瘦馬不敢

畧
過危橋。

大庾驛有懷

一囊書重百餘斤，郵吏寧知去計貧。
莫訝偏吟望鄉句，明朝便是嶺南人。

旅泊

霜月正高鸚鵡洲，美人清唱發紅樓。
鄉心暗逐秋江水，直到吳山脚下流。

樵翁

獨入深山信脚行，慣當羆虎不曾驚。
路傍花發無心看，惟見枯枝刮眼明。

昭君家

曾爲漢帝眼中人，今作狂胡陌上塵。
身死不知多少載，冢花猶帶洛陽春。

聞歌竹枝

巡隄聽唱竹枝詞，正是月高風靜時。
獨向東南人不識，不會弟兄俱在楚江湄。

畧

謝孚

蒼梧卽事

近岼江聲急孤舟下杳冥峽泉飛暴雨灘石
走羣星水有瀟湘色猿同巴蜀聽令人思舜
德一望九疑青

林楚材

賀州富川人布衣南漢書有傳

怨詩

何處期郎遊小苑花臺間相憶不可見且復

乘月還

按雅言雜系楚材贈黃損云身閑不恨辭
官早詩好常甘得句遲

王言史

廣州王園寺伏日卽事寄北中親友

南越逢初伏東林度一朝曲池煎畏景高閣
絕微颺竹簟移先灑蒲葵破復搖地偏毛瘡
近山毒火威饒衰汗絺如濯親床枕並燒墮
枝傷翠羽菱葉惜紅蕉且困流金熾難成獨

南漢文字

卷三

九

畧

酌謠望霖窺潤礎思吹候織條旅恨生烏澗
鄉心繫浴橋誰憐在炎客一夕壯容銷

徐噩

綠珠渡

早出綠蘿村晚過綠珠渡日落白州城草芳
梁女墓江水流古今滔滔不相顧今人不見
古時人依舊青山路如故

周渭

字得臣連州人官南漢亡入宋厯官兩浙
轉運使南漢書有傳

贈道士吳崇岳

楮爲冠子布爲裳吞得丹霞壽最長混俗性
靈常樂道出塵風格早休糧枕中經妙誰傳
與肘後方新自寫將百尺松梢幾飛步鶴棲
枝上禮虛皇

按郡閣雅談吳崇岳泉州龍興觀道士辟
穀多年嘗登松梢禮拜處松枝可六七十
尺福建漕使周渭贈以
詩太平興國詔入京

周濱

全五代詩云濱渭之昆弟

南漢文字

卷三

十

重門曲

憔悴容華怯對春
寂寥宮殿鎖閑門
此身却羨官中樹
不失芳時雨露恩

逢鄰女

日高鄰女笑相逢
慢束羅裙半露胸
莫向秋池照綠水
參差羞殺白芙蓉

廢宅

牢落畫堂空
鎖塵荒涼庭樹暗
消春豪家莫

笑此中事曾見此中人
笑人

林衢

長樂人

題廣州光孝寺

開池曾記虞翻苑
列樹今存建德門
無客不觀丞相硯
有人曾悟祖師幡
舊煎訶子泉猶冽
新種菩提葉又繁
無奈益州經卷好
干絲絲縷未消痕

古成之

字亞夔河源人入宋登端拱二年進士
官綿竹令南漢書有傳

南漢文字

卷三

畧
憶羅浮

憶昔羅浮最上峰當年曾得寄仙蹤
憑欄月色出滄海欹枕秋聲入古松
採藥靜尋幽澗洗寄書閑仗白雲
封紅塵一下拘名利不聽山間午夜鐘

坡山

平元分古觀南鎮越王城五石空留穗羣仙
不記名丹砂雖久鍊鷄犬自長生檻簇鰲頭

景門通鶴脛程烟霞沿砌起花木逐時榮
古井涵虛碧疏鐘入竹清荒蕪延野色寒溜入
秋聲丹竈封苔老芝田積雨平風光齊岳麓
音信接蓬瀛願得身從此乘雲到玉京

按成之未仕南漢而當劉氏未滅時半生
隱居羅浮憶羅浮詩或入宋登第後作也
石仲元 字慶宗桂林七星山道士南漢書有傳

陽朔道中

平原翠削萬瓊瑰頓轡塵沙眼暫開
文網牽

南漢文字

卷三

十三

畧

人寧底急未妨得意看山來

按桂林府志仲元有句云石壓筍斜出岸懸花倒生岸一本作崖

僧卿雲

舊國里

舊居梨嶺下風景近炎方地暖生春早家貧
覺歲長石房雲過濕杉徑雨餘香日夕竟無
事詩書聊自強

秋日江居閒詠

寄居江島邊閑詠見秋殘草白牛羊瘦風高
猿鳥寒檢方醫故疾挑薺備中餐時復停書
卷鋤莎種木蘭

長安言懷寄沈彬侍郎

故園梨嶺下歸路接天涯生作長安草勝爲
邊地花雁南飛不到書北寄來賒堪羨神仙
客青雲早致家

送人遊塞

南漢文字

卷三

七

去去玉關路省君曾未行塞深多伏寇時靜

亦屯兵雪每先秋降花嘗近夏生閑陪射鵝

將應到受降城

無名氏

羅浮山

四百餘峰海上排根連蓬島蔭天台百靈若

為移中土嵩華都為一小堆

附趙氏一首

寄情

春風白馬紫絲韁正值蠶眠未採桑五夜有

心隨暮雨百年無節待秋霜重尋繡帶朱藤

合更認羅裙碧草長為報西游滅離恨阮郎

纔去嫁劉郎

按全五代詩題云趙氏南海人引全唐詩話云房千里初第遊嶺徼舉子韋滂自南海携趙來擬為房妾房不欲韋遂自納為妾又全唐詩千里有寄妾趙氏詩一首序云余初上第遊嶺徼有進士韋滂邀趙氏而來為余妾西上京都調於天官余乃與

畧

趙別約中秋為會期趙極悵戀余乃抒詩寄情是趙氏曾為千里妾千里行後滂乃自娶之故有百年無計待秋霜及阮郎纔去嫁劉郎之語然考千里以唐太和初第進士至梁開平初元已八十年滂會昌二年進士千里詩序稱滂進士則見趙氏時當在會昌二年後然去梁初尚六十年李雨村先生收此詩入全五代詩中不知何據今編南漢詩多採之故附錄而考證焉

先主石讖

人人有一山山值牛兔絲春骨蓋海承劉

羅浮古劍文

丁與水同宮王將耳口同尹來居口上山岫

護重重

廣州童謠

羊頭二四白天雨至

按已上三種解見南漢書後主紀

南漢文字畧卷三

南漢文字畧卷四

順德梁廷相章冉輯

附

閩祭劉隱文

惟靈五羊奧區番禺巨壤漢為列郡唐作雄藩總百蠻五嶺之殷有出將入相之盛是故地啓嘉數天生大賢濬六韜三畧之才謀擅五袴二天之政術俾其於家受詔衣錦馮牙

控二十四州之繁難當二十八齒之美茂光
揚千古冠絕一時至若恢張霸業揚簸清波
臺陟九層靡媿郭隗劍提三尺授自呂虔
持副貳之雄姿遂領節旄之重寄繇是澤施
甘露金肅秋霜掀文房武庫以連雲騰逸氣
英風而偃草上榻則阮瑀下賢則左車從善
則軾間宣威則斷案故得越伏波之銅柱獻
歎而來感鄂公之鐵鞭呈祥以見火山改色

珠浦生光無煩處默之酌泉大鄙趙佗之累
土然後鳴鐘出入調鼎升聞致交趾之封疆
歸石門之教化九遷渥澤克居浴鳳之池雙
立節旄遠過跼鳶之水雖士鮪列弟兄三地
山簡兼荆湘四州語未同年事推曠世嗚呼
是何才德之若彼功業之如此而彼穹者天
不壽其齒天子方欲使降皇華恩宣金冊表
裏東周之盛旌崇南越之隆胡二豎之亟攻

畧
竟三醫之莫救泰山頽壞俄興孔氏之歌漢
水淒涼遽罷羊公之市實國家之不幸實藩
鎮之不幸審知早塵與國旋忝睦鄰雖瓊樹
之未親若銅盤之已接方定金蘭之至分豈
期幽顯之驟殊况以幸結良姻累交專介幕
下崔員外昨馳禮幣常詣門牆爰蒙執手之
權宏敘親仁之旨今則遽悲存歿益歎彭殤
故將薦舉征塵躬申薄奠九泉注望於歎逝

以難勝五月指期表同盟之必至嗚呼曩馳
羔雁今遺蘋蘩伊人事之有茲顧痛傷而何
極然則荀龍賈虎大馮小馮雖嗟松蘿之長
歸終慶荆枝而繼茂永言歡好寧忘初終幸
明靈之一臨鑒此丹赤嗚呼哀哉

劉昌魯致楚書

僕昔占籍鄴中受恩唐室蒞高三歲過黃巢
之亂收合生齒堡于涼山因深爲塹憑高作

畧
壘攻苦食淡以勤士卒洎盜賊平定一境獨
全高涼之民至今相戴而中原多故嶺南不
賓劉隱亂常僭與師律舉蠻貊之眾成吞籙
之心僕常訓勵甲兵躬當矢石掃壘一戰劉
巖遁走雖仗義者必勝恃力者必亡然而山
越之人瘡痍眾矣殘民以騁所不忍爲昔古
公去豳竇融歸漢千古之下迭爲推美僕雖
顛愚景慕前列竊惟明公負江湖之固有桓

文之業士宇至廣仁風素厚願以所部歸欵
干執事謹刺血染翰上達誠悃維明公圖之
梁末帝命錢鏐進取海南劉巖敕

朕聞越紀亂常前王無赦懲惡勸善有國下
私苟罪惡以顯新在刑名而何追其有身當
殊寵旣受國恩敢行不軌之心具驗速辜之
跡頒行典憲仍令詰諸靖海建武等軍節度
使上柱國平南王劉巖頃因乃父發跡本藩

畧

尋賴其兄致身賓席受先朝之拔擢極上將
之寵權念其尊獎之誠許繼藩宣之任乃自
行軍之職繼膺推轂之恩秩進三司位同四
輔自朕獲承大寶累進崇資一門無比其超
榮百世豈酬其寵耀而敢飛章不紀希寵無
厭始求都統四鄰後請封王南越貪饕斯甚
踰僭無階朕每含容再申漫渥授之東鎮加
以南平廼罔思止足益恣凶狂妄稱漢室遺

宗欲繼尉佗醜迹結連淮海阻塞梯航徒惑
遠方僭稱大號在人情而共棄豈天道以能
容宜命討除用清逆亂爾天下兵馬都元帥
錢鏐志扶社稷任總兵師每興憤激之辭願
舉誅夷之令用是俾爾元老討彼叛臣先行
奪爵之文爰舉摧凶之典劉巖在身官爵並
宜削奪於戲將相重任子孫殊榮不能常守
於藩修而乃自干於國典指凶殘而必取念

畧

染汚以將新非我無終始之恩實彼有滿盈之罪凡百珍重悉體朕懷

南唐致劉鋹第一書

僕與足下叨累世之盟雖疆畿阻闊休戚實同敢奉尺書敬布腹心昨大朝伐楚足下疆吏弗靖遂成釁隙初爲足下危之今倣邑使臣入貢皇帝幸以此宣示曰彼若能幡然改圖單車之使造廷則百萬之師不復出矣不

然將有不得已者僕料大朝之心非貪土地也怒人不賓而已且古之用武不計強弱小大而必戰者有四父母宗廟之讎一也彼此烏合民無定心二也敵人進不捨我退無守路戰亦亡退亦亡三也彼有敗亡之勢我乘進取之機四也今足下與大朝無是四者而坐受天下之兵決一旦之命安國家利社稷者固如是乎夫強則南面而王弱則玉帛事

畧
大屈伸在我何常之有違天不祥好爭危事
天方相楚尙未可爭而況今日之事邪地莫
險於劍閣而蜀亡矣兵莫強於上黨而李筠
失守矣竊意足下國中必有矜智好謀之臣
獻尊主強國之策以謂五嶺之險非可遽前
堅壁清野絕其饜道依山阻水射以強弩彼
雖百萬之兵安能成功不幸而敗則輕舟浮
海猶足自全豈能以萬乘之主而屈於人哉

此說士之常談可言而不可用異時王師南
伐水陸並舉百道俱進豈暇俱絕其饜道盡
保其壁壘或用吳越舟師自泉州航海不數
日至足下國都矣人情恟恟則舟中皆爲敵
國忠義敢死之士未易可見雖有巨海孰與
足下俱行乎近奉大朝諭旨以爲足下無通
好之心必舉上秋之役卽命倣邑速絕連盟
雖善鄰之心期於永保而事大之節焉敢固

違恐煜之不得事足下也臣子之情尙不逾於三諫煜之極言於此三矣是爲臣者可以逃爲子者可以泣爲交友者亦惆悵而遂絕矣

南唐致劉鋹第二書

煜與足下叨累世之睦繼祖考之盟情若弟兄義敦交契憂戚之患曷常不同每思會面而論此懷抵掌而談此事交議其所短各陳

其所長使中心釋然利害不惑而相
斯願莫申凡於事機不得款會屢達
明此心而足下視之謂書檄一時之儀近國
梗槩之事外貌而待之汎濫而觀之使忠告
確論如水投石若此則又何必事虛詞而勞
往復哉殊非宿心之所望也今則復遣人使
罄申鄙懷又慮行人失辭不盡深素是以再
寄翰墨重布腹心以代會面之談與抵掌之

畧
一議也足下誠聽其言如交友諫爭之言視其
心如親戚急難之心然後三復其言三思其
心則忠乎不忠斯可見矣從乎不從斯可決
矣昨以大朝南伐圖復楚疆交兵已來遂成
釁隙詳觀事勢深切憂懷冀息大朝之兵求
契親仁之願引領南望於今累年昨命使臣
入貢大朝大朝皇帝果以此事宣示曰彼若
以事大之禮而事我則何苦而伐之若欲興

今古之常事也割地以通好玉帛以事人亦
古今之常事也盈虛消息取與翕張屈伸萬
端在我而已何必膠柱而用壯輕禍而爭雄
哉且足下以英明之資撫百越之衆北距五
嶺南負重溟藉累世之基有及民之澤衆數
十萬表裏山川此足下所以慨然而自負也
然違天不祥好戰危事天方相楚尙未可爭
若以大朝師武臣力實謂天贊也登太行而

伐上黨士無難色絕劍閣而舉庸蜀役不淹時是知大朝之力難測也萬里之境難保也十戰而九勝亦一敗可憂六奇而五中則一失何補況人自以我國險家自以我兵強蓋揣於此而不揣於彼經其成而未經其敗也何則國莫險於劍閣而庸蜀已亡矣兵莫強於上黨而太行不守矣人之情端坐而思之意滄海可涉也及風濤驟興奔舟失馭與夫

坐思之時蓋有殊矣是以智者慮於未萌機者重其先見圖難於其易居存不忘亡故曰計禍不及慮福過之良以福者人之行樂心樂之故其望也過禍者人之所惡心惡之故其思也忽是以福或修於謙望禍多出於不期又或慮有矜功好名之臣獻尊主強國之議者必曰慎無和也五嶺之險山高水深輜重不並行士卒不成列高壘清野而絕其運

畧
糧依山阻水而射以強弩使進無所得退無
所歸此其一也又或曰彼所長者利在平地
今舍其所長就其所短雖有百萬之衆無若
我何此其二也其次或曰戰而勝則霸業可
成戰而不勝則汎巨舟而浮滄海終不爲人
下此大約皆說士孟浪之談謀臣押闖之策
坐而論之也則易行之如意也則難何則今
荆湘以南庸蜀之地皆是使山水習險阻之

民不動中國之兵精卒已逾於十萬矣况足
下與大朝封疆接畛水陸同途殆雞犬之相
聞豈牛馬之不及一旦緣邊悉舉諸道進攻
豈可俱絕其運糧盡保其城壁若諸險悉固
誠善莫加焉苟尺水橫流則長堤虛設矣其
次曰或大朝用吳越之衆自泉州泛海以趣
國都則不數日至城下矣當其人心疑惑兵
勢動搖岸上舟中皆爲敵國忠臣義士能復

幾人懷進退者步步生心顧妻子者滔滔皆是變故難測須臾萬端非惟暫乖始圖實恐有誤壯志又非巨舟之可及滄海之可遊也然此等皆戰伐之常事兵家之預謀雖勝負未知成敗相半苟不得已而爲也固斷在可疑若無大故而思之又深可痛惜且小之事大理固然也遠古之例不能備談本朝當楊氏之建吳也亦人貢莊宗恭自烈祖開基中

原多故事大之禮因循未遑以至交兵幾成危殆非不欲憑大江之險恃衆多之力尋悟知難則退遂修出境之盟一介之使纔行萬里之兵頓息惠民和衆於今賴之自足下祖德之開基亦通好中國以闡霸圖願修祖宗之謀以尋中國之好蕩無益之忿棄不急之爭知存知亡能強能弱屈已以濟億兆談笑而定國家至德大業無虧也宗廟社稷無損

畧
也玉帛朝聘之禮纔出於境而天下之兵已
息矣豈不易如反掌固如太山哉何必扼腕
盱衡履腸蹠血然後爲勇也故曰德輶如毛
鮮克舉之我儀圖之又曰知止不殆可以長
久又曰沉潛剛克高明柔克此聖賢之事業
何恥而不爲哉况大朝皇帝以命世之英光
宅中夏承五運而乃當正統度四方則咸偃
下風獫狁太原固不勞於薄伐南轅返旆吏

屬在於何人又方且遏天下之兵鋒俟貴國
之嘉問則大國之義斯亦以善矣足下之念
亦可以息矣若介然不移有利於宗廟社稷
可也有利於黎元可也有利於天下可也有
利於身可也凡是四者無一利焉何用棄德
修怨自生讐敵使赫赫南國將成禍機炎炎
奈何其可嚮邇幸而小勝也莫保其後焉不
幸而違心則大事去矣復念頃者淮泗交兵

畧
疆陲多壘吳越以累世之好遂首爲厲階惟
有貴國情分愈親驩盟愈篤在先朝感義情
實慨然下走承基理難負德不能自己又馳
此緘近奉大朝諭旨以爲足下無通好之心
必舉上秋之役卽命敝邑速絕連盟雖善鄰
之懷期於永保而事大之節焉敢固違恐煜
之不得事足下也是以惻惻之意所不能云
區區之誠於是乎在又念臣子之情尙不逾

於三諫煜之極言於此三矣是爲臣者可以
逃爲子者可以泣爲交友者亦惆悵而遂絕
矣以下各本所無皇帝宗廟垂慶清明在躬冀日廣
徽猷時膺多福徒切依仁之戀難窮報德之
情望南風而永懷庶幾撫我指月日以自誓
夫復何言

按周必大二老堂雜志云太祖皇帝常令
江南李煜作書諭廣南劉鋹令歸中國煜
命其臣潘佑視草文甚辨麗累數千言今
藏之太祖實錄饒州董氏刻佑集亦有之

畧

然皆不載最後十句蓋私體不敢以聞也
子年十餘歲因隨侍至廣州常得其全文
其辭曰皇帝宗廟垂慶云云今據補入又
按欽定全唐文以載於陸氏南唐
書者為第一書載於宋史者為第二書兩
書雖詳畧不同然詞意大段重複殊不可
解東都事畧所載書與南唐書多異而與
宋史則多同蓋節省第二書原文今不復
載十國春秋所載同宋史而中
少有刪減不知所據何書也

宋潘美等露布

臣聞飛霜激電上帝所以宣威伐罪弔民明
王以之耀武今我國家仰稽元象大啟鴻基

將復三代之土疆永泰萬方之生聚西平巴
蜀雲雷敷潤物之恩南定衡湘江漢鼓朝宗
之浪惟嶺南之獷俗獨特遠以偷安人皆照
臨罔遵聲教偽漢國主劉鋹性惟克惡識本
庸愚以虐害為化風以誅戮為政事置火床
鐵刷之獄人不聊生設剗斫湯鑊之刑古未
曾有恨刀鋒之未快用鋸解之恣情鬻割封
屠窮彼殘毒一境告天而無路生民躋地以

畧

稱冤衆心向明如望皎日皇帝仁心惻隱義切救焚遂發于戈拯其塗炭臣等上憑仁武遙稟睿謀舉軍未及於半年乘勝連收於數郡累逢戰陣無不掃除劉鋹遠懼頃危尋差人使初則稱臣上表具陳歸化之心後則設詐藏姦翻作款兵之計臣與將士仰憑睿旨不敢逗留於正月二十七日甲子到柵日去廣只一程鋹乃頻遣寮佐往來商議漸無憑

準固欲滄延兼於諸路到處新出僞命文榜皆是會合逆黨拒敵王師至二月四日己巳果遣其弟保興等部領舉國軍兵併力決戰將士等感大君之撫御咸願竭忠怒逆寇之執迷爭先效命八十里槍旗競進數萬人殺戮無遺又分布師徒徑收賊累其劉鋹知城隍之必陷將府庫以自焚烈焰連天更甚崑岡之火投戈散地甘從涿野之誅在州百姓

乍除苛虐咸遂生全無不感帝力以霑襟望
皇都而稽首此蓋天威遠被宸算遐敷平七
十年不道之邦救百萬戶倒垂之命殊方既
又長成日月之回光鴻祚無疆永荷乾坤之

降祐

聞詹敦仁復留從劾問劉巖改名龔音義詩

伏羲初畫卦蒼頡乃制字點畫有偏傍陰陽
貴協比古者不嫌名周人始稱諱始諱猶未

酷後習轉多忌或援他代易或變文迴避濫

觴久滋蔓傷心日益熾孫休命子名吳國尊

王意霍苻異僻鉅盃寇焚異梁復踵其非

時亦迹舊事魏杰自其一蜀闖是其二鄙哉

仇啓名陋矣越齟義大唐有天下武后擁神

器私制迄無取古音實相類乖鳳㊀囿○嵐

思至而壘缶罔及鑿亥作史難詳備唐祚值

傾危劉龔懷僭偽吁嗟毒蛟輩睨飛龍位

龔儼雖同音形體殊乖致廢學愧未宏來問
尋不棄可字難雄博摛文伏韓智因誦鄙所
聞敢布諸下吏

南漢文字畧卷四終

